



LE GOUVERNEMENT
DU GRAND-DUCHÉ DE LUXEMBOURG
Ministère de l'Intérieur

La Ministre

La Ministre de l'Intérieur
à
Monsieur le Ministre aux Relations avec
le Parlement

Luxembourg, le 24 septembre 2021

Objet : Question parlementaire n°4865 du 17 août 2021 de l'honorable Député Jeff Engelen concernant le rôle du Syndicat Intercommunal de Gestion Informatique (SIGI) dans le processus de digitalisation de l'État

Monsieur le Ministre,

J'ai l'honneur de vous faire parvenir en annexe la réponse à la question parlementaire sous rubrique.

Veillez agréer, Monsieur le Ministre, l'expression de ma haute considération.

La Ministre de l'Intérieur

Taina Bofferding

Gemeinsam Äntwert vun der Madamm Inneministes, Taina Bofferding, a vum Här delegierte Minister fir Digitaliséierung, Marc Hansen, op d'parlamentaresch Fro n° 4865 vum honorabelen Deputierte Jeff Engelen zum Sujet "Rôle du Syndicat Intercommunal de Gestion Informatique (SIGI) dans le processus de digitalisation de l'État"

D'Digitaliséierung vun de Fluxe vun Dokumenter téschent den Entitéiten aus dem Gemengesecteur an dem Inneministère entsprécht souwuel engem Besoin vum Ministère, wéi enger Demande vum Gemengesecteur selwer.

De Projet de loi n°7514, deen d'Inneministesch déposéiert huet an deen eng Vereinfachung vun der Tutelle administrative viséiert, gesäit dofir och d'Méiglechkeet vun der Aféierung vun enger elektronischer Prozedur fir d'Traitement vun den Dossiere vir, déi dem Contrôle administratif ënnerleien. Duerch d'Digitaliséierung kann den Impakt vum Allégement vun der Tutelle fir de Gemengesecteur nach optimiséiert ginn: D'Dossiere kënnen z.B. direkt vun der Gemeng elektronesch agereecht an hiren Traitement an aller Transparenz noverfollegt ginn. Am Inneministère ass iwwert déi lescht Méint eng Équipe op d'Bee gestallt ginn, déi un der Digitaliséierung vun dese Prozesser schafft, mam Zil, eng Plattform opzebauen, iwwert déi de Contrôle administratif an Zukunft kann ofgewéckelt ginn.

Et ass natierlech wichteg, dofir ze suergen, dass des Fluxen och technesch einwandfrei oflafen. De SIGI krut d'Konzept vun dieser Plattform am Fréijoer virgestallt. Heibäi gouf e regelméissegen Échange mat béiden Acteure lancéiert.

Bis elo ass d'Inneministes net informéiert ginn, dass eng Onzefriddenheet vu Säite vum SIGI soll bestoen, wat d'Kooperatioun mam Ministère am Kader vun diesem Projet ubelaangt. Vu Säite vun der Regierung besteet natierlech d'Bereetschaft, sech nach eng Kéier iwwert dese Projet auszetauschen, sollt dat fir néideg ëmfonnt ginn.

Et sief och drun erënnert, dass den Inneministère de SIGI natierlech regelméisseg a seng informatesch Projete mat abezitt. Sou gëtt et zum Beispill säit Aféierung vun neie Konteplang am Joer 2012 e kontinuéierlechen Échange am Beräich vun der elektronischer Datenerfaassung, ouni deen eist Land och guer net outilléiert wier, sengen europäeschen Obligatiounen no ze kommen.

Och op nationalem Plang schaffen de staatlechen Zenter fir Informatiounstechnologien an den interkommunale Syndikat regelméisseg op strategesche Projeten zesummen. Als Beispill kënnen d'Integratioun vum MyGuichet-Login op der Plattform "MaCommune", d'Bedreiwe vun der Blockchain vum öffentleche Secteur oder d'Vernetzung vun dem nationalen an dem kommunale Regëster vun de physische Persounen ernimmt ginn.

Allgemeng ass eng gutt Zesummenaarbecht téschent dem Staat an dem kommunale Secteur indispensable, fir d'Digitaliséierung am öffentleche Secteur weiderzedreiwten.

Et ass op dieser Plaz wichteg, op den Ënnerscheid téschent Digitaliséierung an Dematerialisatioun anzegoen. Bei enger Dematerialisatioun gëtt e bestoende Prozess um Pabeier 1 zu 1 duerch en elektronischen Datefluss ersat. Bei enger Digitaliséierung gëtt de Prozess selwer op de Leescht geholl a mat Hëllef vun den digitale Méiglechkeeten, déi mir haut hunn, verännert. Well des Ännerungen also net nëmmen technescher Natur sinn, mee an den interne Fonctionnement vun der Gemengeverwaltung

agräifen, organiséiert den Inneministère regelméisseg Échangen a Workshope mat de Gemengeresponsabelen.

An de Statute vum SIGI steet, dass dësen als Aufgab huet *“de permettre aux communes membres, par recours aux technologies de l’information et de la communication, d’assurer de manière optimale l’exécution des tâches qui leur incombent”*. Dem SIGI fällt deementspriechend eng Schlësselroll beim Ëmsetze vun dësen informatéschen Tâchen zou, déi d’Membergemengen dem SIGI uvertrauen.

Am konkrete Projet vun der uewe genannter Plattform, déi den Inneministère en place wäert setzen, ass deementspriechend weiderhi virgesinn, fir souwuel mat de Gemengen, de Gemengesyndikater an Etablissements publics, wéi och méi spezifesch mam SIGI ze kooperéieren.